

ՆՈՐԱԳԱՎԻԹ ԲՆԱԿԱՎԱՅՐԸ ԵՎ
Ս. ԳԵՎՈՐԳ ԵԿԵՂԵՑՈՒ ՎԻՄԱԳՐԵՐԸ

ԱՐՄԵՆ ՀԱՐՈՒԹՅՈՒՆՅԱՆ

Երևան քաղաքի հարավային արվարձանում է գտնվում Շենգավիթ վարչական շրջանի մաս կազմող Նորագավիթ թաղամասը: Հնում այն գտնվել է Մեծ Հայքի Այրարատ նահանգի Կոտայք, ապա՝ Երևանի նահանգի համանուն գավառներում, իսկ խորհրդային տարիներին մի որոշ ժամանակ համարվել է գյուղ Շահումյանի շրջանում: Երևանին է միացել նախորդ դարի 40-ական թվականներին¹:

Հ. Ղևոնդ Ալիշանի բնորոշմամբ՝ Նորագավիթը գտնվել է Նախիջևան տանող արքունի պողոտայի վրա, հայտնի է եղել իբրև այգեվետ ու բարեբեր գյուղ, որն ուներ ավելի քան 100 տուն բնակիչ², իսկ 1873 թ. տվյալներով՝ 88 տուն և 400 բնակիչ³: Պատահական չէ, որ դեռևս XV դարում Գրիգոր Ժ Ջալալբեկյանց (Մակվեցի, 1443–1465) կաթողիկոսն Ամիր Ռուստամից իբրև Մայր Աթոռին միջատու գյուղ գնում է նաև Նորագավիթը: Միմեռն Ա Երևանցի (1763–1780) կաթողիկոսը գրում է, որ Գրիգոր Մակվեցին 90.000 դինարով գնում է Մայր Աթոռին կից Վաղարշապատ գյուղը, որի հետ նաև՝ «...գԱշտարակ, գԲաթոնիչ, գՆորագավիթ, գԱղունատուն, գՔիրաշլու, գՄուղնի: Եւ եօթնից գեղօրէիցս գրելոցս այսոցիկ զղարալայ մի մեծ և կոնդակաձէ գրէ...»⁵:

Բնակավայրը հարուստ է պատմական հուշարձաններով: Այստեղ են գտնվել Ս. Գևորգ, Ս. Գրիգոր Լուսավորիչ, Ս. Կիրակի, Ս. Սարգիս, Ս. Աստվածածին, Ս. Կարապետ, Ս. Նահատակ և Ծիրանավոր եկեղեցիները, որոնցից մի քանիսն այսօր կանգուն ու կիսավեր են, իսկ մյուսների տեղն անհայտ է: Նման թվաքանակը վկայում է, որ բնակավայրը մեծ ու մարդաշատ է եղել, ինչով էլ պայմանավորված՝ այն հաճախ իբրև գյուղաքաղաք է հիշատակվել: Այդ է փաստում Մաշտոցյան Մատենադարանի (այսուհետև՝ ՄՄ)՝ գրչությունը 1687 թ. Էջմիածնում սկսած և 1689 թ. Նորագավիթում ավարտած թիվ

¹ Թ. Խ. Հակոբյան, Ստ. Տ. Մեղիք - Բախշյան, Հ. Խ. Բարսեղյան. Հայաստանի և հարակից շրջանների տեղանունների բառարան, հ. 4, Երևան, 1998, էջ 16:

² Հ. Ղևոնդ Ալիշան. Այրարատ. բնաշխարհ Հայաստանեայց, Վենետիկ, 1890, էջ 320:

³ Տե՛ս նույն տեղում, էջ 285:

⁴ Այսպես են կոչվել մեկ դրամ կշռով հռոմեական դրամները, որոնք հաճախ նույնացվում են նաև դահեկանի հետ (տե՛ս Հայերեն բացատրական բառարան, հ. առաջին, Երևան, 1944, էջ 505):

⁵ Միմեռն կաթողիկոս Երեւանցի. Ջամբո գիրք, որ կոչի յիշատակարան արձանացուցիչ հայելի և պարունակող բնաւից որպիսութեանց Սրբոյ Աթոռոյս և իւրոյ շրջակայից վանօրէիցն, Վաղարշապատ, 1873, էջ 102:

(այսուհետև՝ *Հ⁶*) 1512 «Յայսմաւորք»-ի ծավալուն հետևյալ հիշատակարանը. «Եւ արդ, զօրութեամբ եւ կարողութեամբ ամենագորին Աստուծոյ եղև սկիզբն եւ վաղճան յայսմ մատենիս ի Վաղարշապատ եւ ի հայրապետանիստ Աթոռն Սուրբ Էջմիածին: Բայց զմեծ մասն եւ զլիակատարն գրոցս գրեալ եղև ի գիւղաքաղաքն Նորագաւիթ, ընդ հովանեաւ սրբոց եկեղեցեացս անուամբ Սրբոյն Գեորգայ եւ Սրբոյն Գրիգորի եւ Սրբոյն Սարգսի եւ Սուրբ Աստուածածնին եւ Սուրբ Կարապետին եւ Սուրբ Ծիրանաւորին եւ Սուրբ Նահատակին»⁶: Հիշատակարանն աղբյուրագիտական մեծ արժեք ունի հատկապէս եկեղեցիների անունները թվարկելու առումով: Նորագաւիթ գյուղաքաղաքը, փաստորեն, նաև իր գրչության դպրոցն է ունեցել՝ կապված Մայր Աթոռի հետ: Ս. Էջմիածնում գրչությունն սկսած և Նորագաւիթում ավարտած ձեռագրերից է նաև 1686 թ. գրված ՄՄ Հ⁶ 435 «Ժամագիրք Ատենի»-ն. «Այլ արդ, զժագրեալ աւարտեցաւ սուրբ գիրքս այս ի թուահաշուութեան Արամեանս ազգի հազարերորդի հարիւրերորդի չորից ութոց և երից թուոց առաւելեալ (1686)... Ընդ հովանեաւ Սրբոյ և մեծի Աթոռոյս Էջմիածնի և մասն ինչ՝ ի գիւղաքաղաքն Նորագաւթայ, ձեռամբ յոզնամեղ Գրիգորի Երևանցոյ»⁷: Ի դեպ, այս և նախորդ ձեռագրի գրիչը միննույն անձն է՝ Գրիգոր Երևանցին:

Ինչ վերաբերում է Նորագաւիթի գրչության դպրոցին, ապա նշենք, որ այստեղ գրված կամ այստեղ պահվելու մասին հիշատակություն ունեցող վաղագույն ձեռագիրը կրում է 1465 թ., որի հիշատակարանում կարդում ենք. «Աւետարանս այս ի թուարերութեան Հայկազեան տումարիս ՋԺԴ. (1465) ամին... դարձեալ յիշեցէք ըզՆորայգաւթի քահանայք ըզտէր Չաքարայն և տէր Աստուածատուրն, որ կան ժրաջան ի դուռն Սուրբ Գեորգայ, կարդան և հնամ տանին ի վերայ սուրբ Աւետարանիս, զի կացցէ սայ ի դուռն Գեորգ զաւրավարիս. ամէն»⁸: 1657 թ. Մարտիրոս գրիչն այստեղ ընդօրինակել է նաև մի Սաղմոսարան. «Գրեցաւ աստուածախօս մատեանս՝ աստուածափորն՝ Դաւթի, որ կոչի Սաղմոսարան, ձեռամբ յոզնամեղ և ամենաթշվառ Մարտիրոս գրչի, ի թուականութեանս Հայոց տումարի ՌՃԶ. (1657) ամի... ի գեւղն Նորագաւիթ...»⁹: Ավելի ուշ՝ 1673 թ., ընդօրինակվել է ՄՄ Հ⁶ 7987 «Մաշտոց» ձեռագիրը, որի պատվիրատուն Ովասափ մուղտսի (մահտեսի) Կարբեցին է, գրիչը՝ Արիստակէս սարկաւազ Նորուցցին. «Արդ՝ գրեցաւ սուրբ գիրգս ձեռամբ անարժան Արիստակէս սարկաւազի՝ ի գիւղաքաղաքն Նորայգաւիթ, ի դուռն Սուրբ Գեորգայ վախմըն, ի թվիս ՌՃԻԲ. (1673), ի թագաւորութեան

⁶ Մայր ցուցակ հայերէն ձեռագրաց Մաշտոցի անուան Մատենդարանի, հ. Ե, կազմեց՝ Օննիկ Եզանեան, Երևան, 2009, էջ 152:

⁷ Տե՛ս Մայր ցուցակ հայերէն ձեռագրաց Մաշտոցի անուան Մատենդարանի, հ. Բ, կազմեցին՝ Օ. Եզանեան, Ա. Զէյթունեան, Փ. Անթաբեան, Ա. Քեօշկերեան, Երևան, 2004, էջ 658–659:

⁸ ԺԵ դարի հայերէն ձեռագրերի հիշատակարաններ, մասն երրորդ, կազմեց՝ Լ. Ս. Խաչիկյան, Երևան, 1967, էջ 443:

⁹ Հայերէն ձեռագրերի ԺԵ դարի հիշատակարաններ, հ. Գ, կազմեց՝ Վ. Հակոբյան, Երևան, 1984, էջ 781:

պարսից արքայի շահ Իսմայելին, իշխանութեան յերկրիս Սէֆի Ղուլի խանին, ի հայրապետութեան Սուրբ Էջմիածնայ տեառն Յակոբաւ], որ յայսմ ժամանակիս բազում եկեղեցիք շինեաց...»¹⁰: Հիշատակարանից պարզվում է, որ ձեռագիրը գրվել ու «վախւ» է տրվել Ս. Գևորգ եկեղեցուն, այսինքն՝ նվիրաբերվել է իբրև անձեռնմխելի գույք՝ դառնալով եկեղեցու սեփականությունը, որը խափանողներին գրիչն ուղղում է նգովքի հետևյալ տողերը. «Այլն մի ոք իշխեսցէ հանել զսա ի սուրբ ուխտէս, ծախել կամ գրաւել և կամ այլ ինչ կերպիս հեռացնել ո՛չ քահանայ, ո՛չ տանուտէր, ո՛չ աշխարհական, ո՛չ իմոց և ո՛չ օտարաց: Եթէ ոք յանդնի եւ անհնազանդ լի[ցի]ցի խօսից իմոց զանէժսն Կայենի առցէ եւ զպատիժն Կորխայ եւ Դանայ եւ մասն Յուդայի առցէ եւ այլ խաչահանողացն, մանաւանդ նգովեալ լիցի ԳՃԺԸ. (318) հայրապետացն եւ ի Քրիստոսէ Աստուծոյ մերոյ»¹¹:

XIII–XVII դդ., այսինքն՝ մինչ Երևանի 1679 թ. հունիսի 4-ի ավերիչ երկրաշարժը, Նորագավիթը համարվել է Արարատյան դաշտի բարեկեցիկ օջախներից մեկը: Երկրաշարժից խոնարհվել են տեղի բոլոր եկեղեցիները, որոնցից մի քանիսն են հետագայում իրենց տեղում վերականգնվել, իսկ որոշների միայն ավերակներն են նշմարվում¹²: Պատմագիր Զաքարիա Քանաքեռցին երկրաշարժի վերաբերյալ հաղորդում է հետևյալը. «Ի թուին Ռ և ՃԻ և Ը՝ (1679) ի յունիս ամսոյ Դ (4), աստուածասաստ բարկութիւն եղև ի վերայ երկրին Արարատեան... Այսոքիկ են աւերեալ եկեղեցիք՝ Աղչոց վանք, Այրիվանք... զՆորագաւիթ, զՆորագեղ, զՁորագեղ, զՆորք, զԳամրեգ»¹³: Նույնն է արձանագրում նաև Զաքարիա Ագուլեցին. «1128 (1679) յունիսի Դ (4)-ումն Երևան, օրն Դ (4) շաբաթ, Ե (5) սեպտեմբեր յանկարծակի քամի վեր կացաւ, դղրթում, որոտումն, այնպէս շարժ եղև, որ ական թօթափելու ամէն փլաւ, որ Նորայգավթայ մինչ ի Գօզէն, Ղենարէն մինչ ի Էջմիածին ամէն վեր եկաւ»¹⁴:


¹⁰ Մ. Մաշտոցի անվան Մատենադարան, ձեռ. Շ^մ 7987, էջ 318ա:

¹¹ Տե՛ս նույն տեղում, էջ 318բ: Ձեռագրի Ա փեղկին առկա է սպիտակ թելով ամրացված մետաղյա հավասարաթև խաչ՝ հետևյալ մակագրությամբ. «Բարեխաւս է սուրբ Նշանս Խասայիքային հոգւոյն եւ իւր առն՝ Հեքիմին, ի դուռն Սուրբ Աստուածածնի տաճարին. ամէն, թվին ՌՃԺԹ. (1660)»: Ենթադրելի է, որ հիշատակված Ս. Աստվածածինը Նորագավիթի եկեղեցիներից է:

¹² Տե՛ս Կ. Ասատրյան. Մի էջ Նորագավթի պատմությունից. – ՊԲՀ, 1968, -4, էջ 249: Հնդվածում քննության է առնվել 1937 թ. Նորագավիթի Ս. Գրիգոր եկեղեցուց Երևանի պատմության թանգարան տեղափոխված մի քարաբեկորի արձանագրությունը, ըստ որի, հավանաբար, Շահնշահ Բ Զաքարյանի տիրապետության օրոք գեղջվել է Շահնայի օգտին զանձվող հարկը:

¹³ Զաքարիա Քանաքեռցի. Պատմութիւն: Կոնդակ Սուրբ ուխտին Յօհաննու վանից, աշխ. Ա. Վիրաբյանի, Երևան, 2015, էջ 149:

¹⁴ Զաքարիա Ագուլեցու որագրությունը. յԵրեւան, 1938, էջ 143, տե՛ս նաև Յովհաննէս եպոս. Շահխաթունեանց. Ստորագրութիւն Կաթողիկէ Էջմիածնի եւ հինգ զաւառացն Արարատայ, աշխ. Ա. Տէր-Ստեփանյանի, Սբ. Էջմիածին, 2014, էջ 219:



Ս. Գևորգ եկեղեցու երկայնական կտրվածքը և հատակագիծը (ըստ Կ. Գ. Ղաֆադարյանի, արտաստպված՝ Վ. Հարությունյանի «Հայկական ճարտարապետության պատմություն» աշխատությունից, գծ. 109):

XVII դարավերջի վերոնշյալ ձեռագիր հիշատակարանները փաստում են, որ երկրաշարժից հետո Նորագավիթն արագ վերագարթոնք է ապրել՝ դառնալով գրչության կենտրոն իր մի քանի եկեղեցիներով, որոնցից առավել հայտնին Ս. Գևորգն է (նկ. 1): Ըստ ճարտարապետական հորինվածքի՝ եկեղեցին XVII դ. եռանավ բազիլիկ կառույց է՝ արևմուտքից կից ավելի ուշ կառուցված կամարավոր գավիթ-նախասրահով: Վերջինիս կենտրոնական մասից վեր է խոյանում 12 սյուներով զանգակատան ռոտոնդան, որը յուրահատուկ տեսք ու հմայք է հաղորդում հուշարձանին: Ուղղանկյուն աղոթասրահի (արտաքին չափերը՝ 15,8 x 22,5 մ, ներքուստ՝ 13 x 18,5 մ) կենտրոնում տեղավորված են չորս մույթեր, որոնք միմյանց և արտաքին պատերին հենվող կամարների հետ կրում են կառույցի թաղածածկը: Աղոթասրահի լուսավորման ու օդափոխման համար տանիքն ունի նաև երդիկ՝ վրան փոքր ռոտոնդա: Ավագ խորանին կից են կրկնահարկ ավանդատները, որոնց երկրորդ հարկը բարձրանալու համար բեմի երկու կողմում կառուցվել են 12-ական կոնսոլ աստիճաններ. սրանք ևս ինքնատիպ են աղոթասրահի ճարտարապետական հարդարանքում¹⁵:

¹⁵ Տե՛ս Վ. Հարությունյան. Հայկական ճարտարապետության պատմություն, Երևան, 1992, էջ 381:

Եկեղեցու ավագ խորանի երկու կողմում, ինչպես նաև տանիքի կամարները կրող մույթերի նիստերին պահպանվել են ուշմիջնադարյան որմնանկարներ (հիմնականում՝ սրբապատկերներ), որոնցից մի քանիսը, ցավոք, աղավաղված ու կորստյան են մատնված: Որմնանկարներից մեկը պատկերում է ձի հեծած Ս. Մինասին, որի լուսապսակի ձախ կողմում սևով մակագրված է. «ՄԲ -Ն ՄԻՆԱՍ», իսկ եզրագոտու մեջ՝ միատող. «Յ [Ի] Շ [ԱՏԱ] Կ Է ՊԱՏԿԵՐՍ ՏՐ ԸՍ [ՏԵՓԱՆՈՍԻՆ], ՈՐ Ե [Ի] ԷՍԱՆՕՎ ԿՈՉԻ»: Ըստեփանոս անձնանունը դժվարությամբ է ընթերցվում, քանի որ ներկը տեղ-տեղ թափված է: Մեկ այլ որմնանկարում դարձյալ ձի հեծած Ս. Թեոդորոսն է՝ զիսավերևում սևով. «ՄԲ -Ն ԹԷՈՂՈՐՈՍ»: Եզրագոտու ստորին մասում ևս անընթեռնելի գրեր են նշմարվում:

Ս. Գևորգ եկեղեցին ուշագրավ է նաև իր վիմագրերով, որոնք պահպանվել են ինչպես հուշարձանի պատերի, այնպես էլ՝ շրջակա խաչքարերի ու տապանաքարերի վրա: Այդ քարեղեն վկայագրերը ցարդ ամբողջովին հավաքված և ուսումնասիրված չեն: Գիտական շրջանառության մեջ է դրվում Ս. Գևորգ եկեղեցուց ընդօրինակված 15 ամբողջական և 9 բեկորային արձանագրություն՝ կից գրչանկարներով ու լուսանկարներով¹⁶: Ըստ մեզ հայտնի տվյալների՝ ներկայացվող վիմագրերից միայն 7-ն է հրատարակված (դրանցից 6-ը տեղ են գտել Կ. Ղաֆադարյանի «Երևան» գրքում (Երևան, 1975, էջ 228)՝ անորակ գրչագրերով և առանց լուսանկարների, իսկ մեկը հրատարակել է Վ. Մարտիրոսյանը):

Սկզբնապես Ս. Գևորգ եկեղեցին մուտք է ունեցել միայն արևմտյան կողմից, իսկ հարավային մուտքը բացվել է հետագայում, որտեղ 1887 թ. տեղադրվել է երկաթե դուռ՝ նվիրատվությամբ տիկին Ալմաստ Զաքարյան Կամսարականի: Ահա այդ մասին վկայող վիմագիրը.

1. Հարավային մուտքի բարավորին, արտաքուստ, 8 տող.

ՇԻՆԵՑԱԻ ՆԵՐՔՈՅ ԵՏԵԱԼ ԱՅՍ
ԵՐԿԱԹԱՊԱՏ ՏՈՒՌՆ ԱՐԴԵԱՄԲԲ
ԵԻ ԾԱԽՈՒԲ ԵՐԵՒԱՆ ՔԱՂԱՔԻ
ԲՆԱԿՉՈՒՀԻ ՏԻԿԻՆ ԱԼՄԱՍՏԻ
ՋԱՔԱՐԵԱՆ ԿԱՄՍԱՐԱԿԱՆ ԻՅԻ
ՇԱՏԱԿ ՀԱՆԳՈՒՑԵԱԼ ՈՐԴԻՈՅ
ԻՒՐՈՅ ԱՂԵՔՍԱՆԴԻՐԻ Ի 24 Ն ՄԱ
ՅԻՍԻ 1887 ԱՄԻ

ՇԻՆԵՑԱԻ ՆԵՐՔՈՅ ԵՏԵԱԼ ԱՅՍ / ԵՐԿԱԹԱՊԱՏ
ՏՈՒՌՆ՝ ԱՐԴԵԱՄԲԲ / ԵԻ ԾԱԽՈՒԲ
ԵՐԵՒԱՆ ՔԱՂԱՔԻ / ԲՆԱԿՉՈՒՀԻ ՏԻԿԻՆ
ԱԼՄԱՍՏԻ / ՋԱՔԱՐԵԱՆ ԿԱՄՍԱՐԱԿԱՆ, Ի
ՅԻ/ՇԱՏԱԿ ՀԱՆԳՈՒՑԵԱԼ
ՈՐԴԻՈՅ / ԻՒՐՈՅ
ԱՂԵՔՍԱՆԴԻՐԻ, Ի 24-Ն
ՄԱ/ՅԻՍԻ, 1887 ԱՄԻ¹⁷:


Ս. Գևորգ եկեղեցու վիմագրերը հիմնականում թվագրվում են XVII և հետագա դարերով, սակայն ներսում՝ որմերի տարբեր հատվածներում, օգտագործվել են մինչ 1679 թ. երկրաշարժը գոյություն ունեցած կառույցի արձանագիր ու խաչաքանդակ բազմաթիվ -

¹⁶ Գրչանկարներն ու լուսանկարները մերն են:
¹⁷ Տե՛ս Վ. Մարտիրոսյան. Նորագավիթի Ս. Գևորգ եկեղեցի, Երևան, 2011, էջ 21:

քարեր: Ըստ ակադ. Վարազդատ Հարությունյանի՝ տառաձևերից դատելով՝ գրերը պատկանել են Նորագավիթի միջնադարյան հուշարձաններին¹⁸: Ս. Գևորգ եկեղեցու պատմությանը նվիրված փոքրածավալ ուսումնասիրության մեջ այդ մասին գրում է նաև նորագավիթցի Վարդգես Մարտիրոսյանը. «...եկեղեցին կառուցելիս օգտագործվել են երկրաշարժից ավերված նախկին եկեղեցուն պատկանող արձանագրված քարեր: Դրանք նկատելի են հյուսիսարևելյան ավանդատան և աղոթասրահի հարավային պատերում»¹⁹: Նշենք, որ արձանագիր քարեր տեսանելի են նաև եկեղեցու հարավարևելյան ավանդատան ներսի շարվածքում, հյուսիսային ու արևմտյան որմերի տարբեր մասերում: Հաշվի առնելով տառաձևերի հնագրական, ինչպես նաև վիմագրերի բովանդակային առանձնահատկությունները՝ գրերը հարազատ են XII–XIII դդ.: Արձանագրությունների խառք, ապա հիմնականում հակառակ դիրքերով ազուցումը պատի շարվածքում հուշում է, որ դրանք գործածվել են իբրև շինաքարեր՝ առանց կարևորելու գրերի առկայությունը: Մենք փորձել ենք պահպանված արձանագրությունների բեկորները վերծանել ու իմաստային ընդհանրություն գտնել:

Գրերի նախնական ուսումնասիրությունը փաստում է, որ գործ ունենք մի քանի վիմագրերի հետ՝ կազմված մեկ և մի ուրիշ արձանագրության կամ արձանագրությունների երեք տողերից: Տառաձևերը բավական վայելչագիր են, տողերը՝ համաչափ, փորագրված հմուտ գրչի ձեռքով: Նախ անդրադառնանք եռատող վիմագրերի հատվածներին:

2-5. Արձանագրված շինաքարեր եկեղեցու ներքին շարվածքում.



2. † Ի Վ [ԻՆ] Ո... /

...ԻՆ ՔԱ... /

... [ՆՅՈՆ] ...

3. ... [ԹԱԳ] ԱԲՈՐՈՒԹԵ [ԱՆ] ԴԵ [ՄԵՏՐԵԻ] ... / ... [Ե] ՁԵԿԷԼ ՏՈՒԻԻ... / ...ԱՄԱԷՔ ՏԵՍԱՔ...

4. ... [ԴԵ] ՄԵՏՐԵԻ ՇՐԱ [ՄԱՆԱԻ] ... / ... [Ի] Մ ՅԵՐԿԱՐ ԿԵՆԱ [Յ] ... / [ԵԻ ՎԻՐԿԱԻՔ] ...

5. ... [ՆՈՐ] ԱԳԱՎԻԹ Ո... ... [ԳՆԵ] ՅԻ կամ [ՇԻՆԵ] ՅԻ ԻՄ ՇԱ [ԼԱԼ] ... / ...ՇԱՐԻԱՆ...

¹⁸ Տե՛ս Վ. Հարությունյան. նշվ. աշխ., էջ 381–382:

¹⁹ Տե՛ս Վ. Մարտիրոսյան. նշվ. աշխ., էջ 22:

Առաջին արձանագրության սկզբնամասը, բարեբախտաբար, պահպանվել է այն սկսվում է շրջանի մեջ ներառված հավասարաթև խաչաքանդակով, ինչը հատուկ է XII–XIII դդ. վիմագրերին: Խաչին հաջորդում է թվագիրը. Ի ԹՎ [ԻՆ] Ո... (1151): Ցավոք, կիսով չափ պահպանված է թվագրի միայն Ո հարյուրավորը, որին, ըստ ամենայնի, պետք է հաջորդեին տասնավորն ու միավորը կամ էլ դրանցից որևէ մեկը: Այսքանն էլ բավական է հասկանալու համար, որ վիմագիրը XII դարից վաղ չէ և ոչ ուշ՝ XIII դարի կեսերից:

Շինաքարերից մեկին՝ օգտագործված եկեղեցու հյուսիսային որմի մեջ, կարդում ենք վրաց Դեմետրե թագավորի անվան սկզբնամասը, ապա վկայված է ոմն Եզեկելի կողմից արված ինչ-որ նվիրատվություն: Ենթադրելի է, որ վիմագրի այս հատվածը պետք է հաջորդած լիներ թվական ունեցող վերոնշյալ գրին, սակայն, հաշվի առնելով այն, որ նման դեպքում պետք է հիշատակված լիներ Դավիթ Շինարարին հաջորդած ու 1125–1155/56 թթ. գահակալած Դեմետրե Ա թագավորը²⁰, իսկույն ժխտվում է մեր ենթադրությունը, քանի որ Դեմետրեն Դվինի ամիրայությունների դեմ պայքարում 1131 թ. կարողացել էր հասնել մինչև Գառնի: Հենց այստեղ է, որ «...վրացական զորքերը, որոնց գլխավորում էին Աբուլեթը և նրա որդի Իվանեն, պարտություն կրեցին, իսկ Վրաստանը մինչև ԺԲ դարի 60-ական թվականները այլևս փորձեր չարեց շարունակել հարձակումը Հայաստանում Դվինի ուղղությամբ»²¹: Մնում է հավաստել, որ թվականը պատկանում է մեկ ուրիշ արձանագրության, իսկ վիմագրում հիշատակվածը պետք է որ «Հայոց և Վրաց»²² թագավոր, Անձնուրաց մականվամբ Դեմետրե Բ-ն (1271–1289) լինի: Վերջինիս անունը կարդում ենք նաև մեկ այլ շինաքարի վիմագրում, իսկ եկեղեցու աջ ավանդատան քարերից մեկին ընթեռնելի են Նորագավիթ տեղանունը, շարիատ հարկային տերմինը, այսինքն՝ սա էլ նվիրատվության, հարկատվության կամ ապահարկության (թերևս, -

²⁰ Հայ ժողովրդի պատմություն, հ. III, Հայաստանը զարգացած ֆեոդալիզմի դարաշրջանում (IX դ. կեսերից մինչև XIV դ. կեսերը), Երևան, 1976, էջ 526:

²¹ Տե՛ս նաև Չ. Գ. Մարգարյան. Հյուսիսային Հայաստանի և Վրաստանի ԺԲ դարի պատմության մի քանի հարցեր, Երևան, 1980, էջ 76:

²² Ավանի 1285 թ. արձանագրության սկսվածքում ևս Դեմետրեն հիշատակված է իբրև «Վրաց և Հայոց» թագավոր (տե՛ս Կ. Ղաֆադարյան. Ավանի երկլեզվյան ծածկագիր արձանագրությունը, Երևան, 1945, էջ 18–19): Պ. Մուրադյանի կարծիքով, նման բնութագրումը միայն բարի ցանկության դրսևորում չէր, այլ իր հիմքում ուներ նաև փաստական-պաշտոնական տարր, որը հարատևել է ընդհուպ մինչև XVIII դարավերջ, երբ հնդկահայ հրատարակությունների տիտղոսաթերթը վրաց Հերակլ II թագավորի հասցեագրումով էր կազմվում (տե՛ս Պ. Մ. Մուրադյան. Հայաստանի վրացերեն արձանագրությունները. աղբյուրագիտական քննություն, Երևան, 1977, էջ 18–19):

զեղչվել է գյուղից գանձվող շարիատը՝ մթերքի մեկ տասներորդ մասը) վերաբերյալ վկայագիր է, որը եթե վերոնշյալ արձանագրության մաս չէ, ապա ժամանակակից է նրան:

6. Ձախ ավանդատան մուտքի երկու կողմում օգտագործված շինաքարերից երկուսին նս վիմագրեր են պահպանվել:


Վիմագիրը համեմատաբար ամբողջական է, բնույթով՝ նվիրատվական, միայն թե անհայտ է մնում նվիրաբերված առարկան: Ըստ էության, վկայված է ծագումով հունարեն Սոսթանես արական անձնանունը: Այն քանիցս հանդիպում է մատենագրության մեջ և վիմագրերում: Հավուց թառի՝ 1213 թ. կառուցված Ս. Կարապետ մատուռի շինարարական արձանագրության մեջ կարդում ենք, որ աշակերտներ Սոսթանեսը, Մատթեոսն ու Գրիգորեսը մատուռը կառուցել են իրենց երկու ուսուցիչների՝ Սեթի և Սիմավոնի գերեզմանների վրա. «...մեք՝ նուստ աշակերտք Սիթա եւ Սիմավոնի՝ Սոսթանէս եւ Մաթէոս եւ Գրիգորէս, շինեցաք զսուրբ Կարապետս ի վերայ շիրմաց սոցա...»²³: Դառնալով քննվող վիմագրին՝ նշենք, որ այն ավարտվում է նվիրագրերին հատուկ նզովքի բանաձևով. այս դեպքում պայմանը չկատարողները կամ խափանողները պետք է նզովվեն երեք սուրբ ժողովների անունից, այսինքն՝ նկատի են առնվում տիեզերական երեք ժողովները [Նիկիայի Ա (325 թ.), Կ. Պոլսի Բ (381 թ.) և Եփեսոսի Գ (431 թ.)], որոնց ընդունած սկզբունքները կազմում են հայ եկեղեցու դավանական հիմքը: Սկսած VI դ. կեսերից՝ հայ դավանաբանական գրվածքներում այս ժողովները հիշվում են միասին՝ որպես սուրբ ժողովներ²⁴, ինչպես քննվող վիմագրում: Բացառված չէ, որ վերոնշյալ թվակիր քարը հենց այս արձանագրության սկզբնամասը լինի:

²³ Տե՛ս Գարեգին արք. Յովսէփեանց. Հաւուց թառի Ամենափրկիչը եւ նոյնանուն յուշարձաններ հայ արուեստի մէջ, Երուսաղէմ, 1937, էջ 22, նաև՝ Կ. Մաթևոսյան. Հավուց թառի վանքը, Երևան, 2012, էջ 35:

²⁴ Տե՛ս Քրիստոնյա Հայաստան հանրագիտարան, Երևան, 2002, էջ 1016:

Արձանագիր երկրորդ քարաբեկորի վերնամասում պահպանվել է մանրատառ և անկանոն գրչությամբ հետևյալ վիմագիրը. ՋԱՄԵՆԱՅՆ ՅԻՇԵՑԷՔ Ի ՔՍ: Կարծում ենք՝ այն ժամանակակից է բուն արձանագրությանը, պարզապես ավելացված է այլ գրչի ձեռքով:

7-8. Եռատող արձանագրությամբ ևս երկու շինաքար է օգտագործվել եկեղեցու արևմտյան և հարավային որմերի շարվածքում: Ցավոք, գրերն անկապակից են.



ա. ...ԱՊ... / ...ՅԻ... / ՈՒՏ...
բ. ... / ՀԱՐ / ...ՈՐՅԱՍ...

9. Թվով ինը շինաքարի վրա պահպանվել են նաև նախորդներին գրչությամբ ու ժամանակով հարազատ միատող արձանագրության հատվածներ.

ԼՈՒՏԵՐԲՈՐ ԱՔԱՃԱՍԵՐՆ ԴԻԱԲՆՈՂՈՒՏ ԱԶՄԱԿՈ ՉԻԱՅՐԷ
ԻՆՈՅԱՄՅԱՅԼ ԻԿԱՌԲԱՆ ՇՏԱԿԱՔՈՍ ԳԼՈՒԽԵՆ

... [ՏԱՆ] ՈՒՏԵՐՔ, ՈՐ... / ...ԱՔ Ա [ՍՏՈՒԱ] ԾԱՍԵՐ Տ/ՈՒԱՔ ՀՈՂ, ՈՐ
Ի Հ/ՆԻՋՈՂԱԿ ԿՈ/ՉԻ ՀԱՅՐԵ [ՆԻՔ] ... / ...ԻՄՈՅ ԱՄԻ ՅԱՅԼ /
...Ի ՀԱՐՈՒՆԱՇ... / ... [ՀՐԵ] ՇՏԱԿԱՓՈՍ... / ԳԼՈՒԽՆ Է ՀՈ...

Առաջին հայացքից վիմագիրը (վիմագրերը) բնույթով նվիրատվական է, ուր վկայված է հողի կամ հանդամասի (որը, ենթադրում ենք, թե Հնիձողակ է կոչվել) հատկացման կամ հող նվիրաբերելու մասին, որի դիմաց, ըստ էության, պիտի պատարագ տրվեր:

Ս. Գևորգ եկեղեցու վիմագրական ժառանգության մասն են նաև կոթողային հուշարձանների, մասնավորապես՝ եկեղեցու որմերին ազուցված և առանձին կանգնեցված խաչքարերի արձանագրությունները: Եկեղեցու հարավարևելյան կողմում, ըստ էության, գերեզմանոց է եղել, որտեղ պահպանվել են XVI–XVII դդ. հարազատ շուրջ մեկ տասնյակ խաչքարեր: Դրանցից մի քանիսը, ցավոք, ընկած ու երկատված են, մի քանիսն էլ կանգնեցված են ոչ ամբողջական: Խաչքարերից հինգի քիվերն արձանագիր են, որոնցից մեկը՝ եղծված, մնացած չորսը կրում են հետևյալ արձանագրությունները:

10. ԽԱՉՔԱՐ. կանգնեցված եկեղեցու արևելյան կողմում, քիվին, 1 տող.



ՄԲ (Խ [Ա.] ՉՍ ԲԱՐԵԽԱԻՍ Է ՄԱՆՈՒԷԼ
ԵՊ [Ի] Ս [ԿՈՊՈՍ] Ի [Ն] ²⁵:


Կ. Ղաֆաղարյանն անձնանունը կարդում է հմանուել:

11. ԽԱՉՔԱՐ. երկատված, ընկած եկեղեցու արևելյան կողմում, քիվին, 1 տող.




ՄԲ Խ [Ա.] ՉՍ ԲԱՐԵԽԱԻՍ ԳԵՂԵՑԵԿԻՆ
ԵԻ ՄԱԻՐՆ:

12. ԽԱՉՔԱՐ. երկատված, ընկած եկեղեցու արևելյան կողմում, քիվին, 1 տող.



ՄԲ ԽԱՉՍ ԲԱՐԵԽԱԻՍ Է
ՏՐ ԱՎԱ [ՔԻՆ] :

13. ԽԱՉՔԱՐ. երկատված, ընկած եկեղեցու արևելյան կողմում, քիվին, 1 տող.



ՄԲ ԽԱՉՍ ԲԱՐԵԽԱԻՍ ...

²⁵ Տե՛ս Կ. Ղաֆաղարյան. Երևան. միջնադարյան հուշարձանները և վիմական արձանագրությունները, Երևան, 1975, էջ 228: Կ. Ղաֆաղարյանը ծանոթագրում է, որ Ս. Գևորգ եկեղեցուց ներկայացված թվով յոթ վիմագրերը հավաքել ու իրեն է հանձնել վիմագրագետ Աբրահամ Շահինյանը: Մեր հավաքածուում դրանք շնորհիվ 10, 11, 14, 15, 16, 17 արձանագրություններն են:

Անձնանունը եղծված է:

2011–2012 թթ. նորակերտ խաչքարեր են կանգնեցվել նաև գավիթ-նախասրահի մեջ՝ մուտքից աջ՝ նվիրատվությամբ Գևորգյան, Ատունյան ընտանիքների, ինչպես նաև՝ տեր և տիկին Դումանյանների: 2011 թ. խաչեղբայր Հարությունյանների միջոցներով նման մի խաչքար էլ կանգնեցվել է եկեղեցու հարավային կողմում՝ մուտքի դիմաց:


Եկեղեցու արտաքին պարզ ու անպաճույճ հարդարանքին գեղարվեստական տեսք են հաղորդում արևելյան պատի ու նախասրահի ճակատային մասերում առկա պատկերաքանդակները, ինչպես նաև բոլոր լուսամուտների վերնամասերում ազուցված խաչքարերը: Արևելյան պատի կենտրոնում պատկերված են Ավետարանը ձեռքին Մարկոս ավետարանիչը՝ իր խորհրդանիշ առյուծի և Հովհաննեսը՝ արծվի հետ. վերջինիս կից արևի պատկերաքանդակը, թերևս, կապվում է Հայտնության՝ Քրիստոսի Արևելքից երկրորդ անգամ գալստյան հետ: Նախասրահի պատկերաքանդակներն ազուցված են կենտրոնական կամարների միջնամասերում. դրանցից մեկին Ավետարանը ձեռքին Ղուկաս ավետարանիչն է՝ իր խորհրդանիշ եզան հետ, իսկ մյուսին՝ Մատթեոսը: Ուշագրավ է նաև գլխավոր մուտքի ճակատաքարի հարդարանքը. կենտրոնում ազուցված խաչքարի երկու կողմում Մարկոս և Ղուկաս ավետարանիչներին խորհրդանշող առյուծի ու եզան պատկերաքանդակներն են՝ իրենց ավետարանների հետ: Սրանցից բացի, չորս փոքրաչափ խաչքարեր են ազուցված եկեղեցու արևմտյան պատին՝ նախասրահի մեջ, և մեկը՝ արևելյան որմին՝ աջակողմյան լուսամուտի մոտ. բոլորն արձանագիր են:

14. ԽԱՉՔԱՐ. ազուցված եկեղեցու արևմտյան որմին, մուտքից աջ, 6 տող.



ՅՍ ՔՍ / ԹՎ [ԻՆ] ՌՂԱ (1642) /
 ՍԲ Խ [Ա] ՉՍ / ԲԱՐ [Ե] ԽԱԻՍ ՏՐ ՄԱ/ԲԳԱՐԻՆ
 ԵԻ [ԻԻ] Բ ԿՈ/Ղ [Ա] Կ [ՅԻ] Ն՝ ԳԱՅԱՆԻՆ:

15. ԽԱՉՔԱՐ. ազուցված եկեղեցու արևմտյան որմին, մուտքից աջ, 5 տող.



ԹՎ [ԻՆ] / ՌՂԱ (1642) / ՍԲ / ԽԱ [ՉՍ] /
 ԲԱՐԵ/ԽԱԻՍ / ԱԻԵ [Տ] ԻՍԻՆ ԵԻ Կ [Ո] Ղ [ԱԿՅ] ԻՆ:


16. ԽԱՉՔԱՐ. ագուցված եկեղեցու արևմտյան որմին, մուտքից ձախ, 5 տող.



ՅՍ ՔՍ / ԹՎԻ [Ն] ՌՂԱ (1642), ՍԲ Խ[Ա] Չ[Ս] /
ԲԱՐԵ/ԽԱԻՍ / ՏՐ Վ/Ա [Ը] ԴԱՆԻՆ / ԵԻ Ո [Ը] ԴՈՆ՝
ՅՈՎԱՆԻՍԻՆ, ՏՐ ԿԱՐԱՊԵ [Տ] ԻՆ:


Հետաքրքիր է թվականի Ռ հազարավորի փորագրման ձևը, որը կցագրված է ԹՎԻՆ-ին: Այս երևույթը Կ. Ղաֆադարյանը չի նկատել՝ կարծելով, թե փորագրիչը վրիպել է: Վերջին տողի ՈՐԴՈՆ-ը ևս նա չի կարդացել²⁶:

17. ԽԱՉՔԱՐ. ագուցված եկեղեցու արևմտյան որմին, մուտքից ձախ, 2 տող.



ՍԲ Խ[Ա] ՉՍ Բ[ԱՐ] ԷԽԱ[Ի] Ս /
ՎԱՐ [Դ] ԱՆԻՆ ԵԻ ԿՈՂ [ԱԿՑ] ԻՆ:

18. ԽԱՉՔԱՐ. ագուցված եկեղեցու արևելյան որմին, աջակողմյան լուսամուտի մոտ, միատող արձանագրությունը բոլորում է քարը, ապա՝ վերին ուղղահայաց խաչաթևը.



[ՍԲ ԽԱՉՍ] ԲԱՐ [Ե] ԽԱԻՍ Է ԱԻԱՔԻՆ ԵԻ
Վ [Ե] Ն [Ա] ԿՑԻՆ՝ ՄԱԹԵԱՇԻՆ, ԱՆԴՐԻԱՍԻՆ,
Յ [Ո] ՎԱՆԻՍԻՆ, / ԵՂՍԱ/ԲԵ/ԹԻՆ:

²⁶ Տե՛ս նույն տեղում:

Համաձայն արձանագրության՝ խաչքարը կերտվել ի հիշատակ Ավաքին, նրա կողակից Մաթիսաշին, Անդրիասին, Յովանիսին ու Եղսաբեթին. վերջիններս, թերևս, նրանց զավակներն են: Այս և վերոնշյալ խաչքարային հիշատակագրություններում վկայված անձինք, հավանաբար, եկեղեցու այցելու-նվիրատուներն են:

Ս. Գևորգ եկեղեցու վիմագրերի թիվը համալրում են նաև տապանագրերը: Մինչ բուն տապանաքարերին անցնելը նշենք, որ այդօրինակ բովանդակության հիշատակագրություններ են պահպանվել նաև նախասարահի կամարակիր սյուների, որտեղ նախկինում գերեզմաններ են եղել:

19. ՆԱԽԱՍՏԱՀ. կամարակիր մույթի հարավային նիստին՝ 4 տող.

ԱՅՍԵՐՔՈՂԱՆ
ԼՈՒՍԱՀՕԳԻՏԱՆ
ՌՏՐԳՐԻՔՈՐՈՐՈՐ
ՆԵԱՆ*1834ԿԻ

ԱՅՍ ՆԵՐՔՈ ՂԱՊԱՆ / ԼՈՒՍԱՀՕԳԻ
ՏԱՆ/ՈՒՏ [Է] Ը ԳՐԻՔՈՐ ՏԵՐ/ԴԵՐԻԱՆ, 1834-ԻՆ:

20. ՆԱԽԱՍՏԱՀ. հանդիպակաց մույթի հյուսիսային նիստին, 4 տող.

ԱՅՍԵՐՔՈՂԱՆ ՆԼՈՒ
ԱՀՕԳԻ ՅՕՀԱՆ ԷՍՓՈ
ՔՐԵՂԱՐԳՐԻԳՐԿԻ
1834


ԱՅՍ ՆԵՐՔՈ ՂԱՊԱՆ ԼՈՒՍԱՀՕԳԻ
ՅՕՀԱՆԷՍ՝ ՓՈ/ՔՐ ԵՂՊԱՐ ԳՐԻՔՈՐԻՆ, 1834:

Դատելով արձանագրություններից՝ ննջեցյալներից մեկը, թերևս, գյուղի տանուտերն է, մեծավորը, մյուսը՝ նրա փոքր եղբայրը: Նրանց համաժամանակյա մահը, հավանաբար, դժբախտ պատահարի կամ համաճարակի հետևանք է:


21. ՏԱՊԱՆԱՔԱՐ. հարթ ուղղանկյունաձև, եկեղեցու հարավային կողմում, 2 տող.

ՍԱ Է ՇԻՐԻՍ, ՈՐ ՆՇԱՆ ԽԱԶԻՆ
ՊԱՊԱՆԵՍ Է Ա [ՍՏՈՒԱ] ԾՈՐԴԻՆ:

ՍԱ Է ՇԻՐԻՍ, ՈՐ ՆՇԱՆ ԽԱԶԻՆ
ՊԱՊԱՆԵՍ Է Ա [ՍՏՈՒԱ] ԾՈՐԴԻՆ:



Նկ. 1



Արձ. 1



Արձ. 2-5



Արձ. 6



Արձ. 9 (ա-թ)



Արձ. 10




Արձ. 11



Արձ. 12



Արձ. 13



Արձ. 14-17



Արձ. 18




Արձ. 19



Արձ. 20




Արձ. 21



Արձ. 22




Արձ. 23



ՆԿ. 24



Ուշագրավ է տապանագրում խաչ բառը խաչաքանդակով արտահայտելու եղանակը: Պապանեսը, ըստ երևույթին, անձնանուն է՝ Պապան, Պապանուն անվանաձևերից²⁷ կամ էլ գործ ունենք պահպանել բառի գործածության հետ: «Պ» գրերը փորագրիչը կերտել է հակառակ դիրքով: Սրա հարևանությամբ առկա է մարմարյա ևս մեկ տապանաքար՝ խիստ կոտրատված վիճակում. հնարավոր եղավ միայն պարզել, որ ննջեցյալը ոմն Տեր-Կարապետյանցն է:

22. *ՏԱՊԱՆԱՔԱՐ. ուղղանկյուն օրորոցաձև, եկեղեցու հարավային կողմում, հարավային նիստին, 4 տող.*



ԱՅՍ Է ՏԱՊԱՆՆ ՅԱՆԳՈՒՑԵԱԼ
ՊԱՊԻ ՅՈՒՎԶԱՆՆԷՍԵԱՆԻ, ՎԱԽՃ/ԱՆՈՒԵՑԱԻ 60-
ԱՍԵԱ ՀԱՍԱԿԻ,
1908 ԹԻՒՆ, 25 ՓԵՏ [Ը] ՈՒԱՐԻ:

23. *ՏԱՊԱՆԱՔԱՐ. սյունաձև, նախորդի հարևանությամբ, արձանագիր են սյան միջնամասի արևելյան և հյուսիսային նիստերը, առաջինը՝ 9, երկրորդը՝ 7 տողից.*



Արևելյան նիստին.
ԱՅՍ Է / ՏԱՊԱՆՆ / ՀԱՆԳՈՒՑ/ԵԱԼ ԼՈՒՍԱ/ՀՈԳԻ
ԿԱՐԱ/ՊԵՏԻՆ, ՈՐ Է / ՈՐԴԻ ՎԱՐ/ԴԱՆ
[ԶԵ] ԼԱ/ԲԵԱՆՑԻ:

Հյուսիսային նիստին.
ԾՆԵԱԼ Ի / 1881 ԱՄԻ / ԱՊՐԻԼԻ
10-Ն, / ՎԱԽՃԱՆ/ԵԱԼ Ի 1911 /
ԱՄԻ, ՓԵՂԸ/ՎԱՐԻ 13-Ն:

24. *ՏԱՊԱՆԱՔԱՐԻ ԲԵԿՈՐ. եկեղեցու հարավարևելյան կողմում, 3 տող.*

²⁷ Տե՛ս Հր. Աճառյան. Հայոց անձնանունների բառարան, հ. Դ, Երևան, 1948, էջ 224:

2013 թվականից եկեղեցու հոգևոր հովիվն է Տ. Վարդան քահանա Գափոյանը (խնդրակատար՝ Տ. Մյուռոն քահանա Ադամյան), որի անմիջական հսկողությամբ մշտապես բարեգարդվում է եկեղեցին ու նրա շրջակայքը: Բակում են գտնվում մատաղատունն ու երիցատունը, կից գործում են կիրակնօրյա դպրոցը, երիտասարդաց ու տիկնանց միությունները:

Երևանի Նորագավիթ թաղամասի Ս. Գևորգ եկեղեցին հավատացյալների նշանավոր սրբավայրերից է:

ПОСЕЛЕНИЕ НОРАГАВИТ И ЭПИГРАФИЧЕСКИЕ НАДПИСИ ЦЕРКВИ СВ. ГЕВОРГ

АРСЕН АРУТЮНЯН

Резюме

Поселок Норагавит известен своими многочисленными церквами (Св. Геворг, Св. Григорий Просветитель, Св. Воскресенье, Св. Саркис, Св. Богородица, Св. Карапет, Св. Нагатак, Циранавор). В одной из рукописей собрания Матенадарана им. Месропа Маштоца (№ 1512) сохранилась памятная запись, в которой засвидетельствованы все восемь церквей Норагавита. Самой известной из них является трехнефная базилика Св. Геворг, к которой позже был пристроен сводчатый гавит (притвор). Примечательно, что при перестройке церкви были использованы многочисленные покрытые резьбой камни, оставшиеся от предыдущей постройки и несущие фрагменты текстов, близких надписям XII–XIII веков. Судя по сохранившимся на них именам, использованным терминам, надписи являются отдельными частями текстов о пожертвованиях, отмене податей. Частью эпиграфического наследия церковного комплекса являются надписи, вырезанные на монументальных памятниках – хачкарах, надгробьях, которые, не будучи столь древними, все же важны для понимания общей картины. Из представленных 18-ти полных и 17-ти фрагментарных надписей ранее были опубликованы семь.

THE SETTLEMENT OF NORAGAVIT AND
THE EPIGRAPHIC INSCRIPTIONS OF CHURCH OF ST. GEVORG

ARSEN HARUTYUNYAN

S u m m a r y

The location of Noragavit is famous for its manifold churches (St. Gevorg, St. Gregory the Illuminator, St. Kiraki (Sunday), St. Sargis, St. Astvatsatsin, St. Karapet, St. Nahatak, Tsiranavor). One of the manuscripts of Institute of Ancient Manuscripts “Matenadaran” (№ 1512) has preserved a mention, where are certified eight churches of Noragavit. The most famous of them is St. Gevorg three-nave basilic, which is rebuilt in the 17th century. And later, the adjacent of the western wall of church was built the hall-vestibule. The epigraphic inscriptions of the church haven’t been fallen under any research so far. Many building stones with inscriptions have been used during the reconstruction work. They are fragments of inscriptions, dated approximately to the 12th–13th centuries. We try to find connections with them. According to the names and terms above, the individual parts of donations and tax exemption are protected. Among the pieces of epigraphic heritage of church of St. Gevorg are inscriptions of monumental memorials (cross-stones, tombstones). Although they are not so ancient, but they have important perspective of such epigraphic completion. Out of 18 complete and 17 missile discussed epigraphy formely have been published only seven.